

Páwòlò cu wáràgà jì TÍTÒ

¹ Nìno a ye tí Páwòlò, tí bòò mì Mbírì, ye delè a tú mì Bìndi-Mbírì. Mbírì cu 'bì wó á mítí ye, bìndi yí gii tuu ye gí bà konì ndâ 'duù tí nó náa yí tí Mbírì ruka ndú tí ndâ nìno mì wó gí nó ta bà kili wu gí tà bà tee njembí ndú mítí wó, delè gí bà nìbà yúco tí nó mbe 'vii ta có mì wó tí Mbírì nò,

² yúco tí nó mbe kù je muu jì ndú gítí bà koṛo có lè mítí 'válá tí nó mbe cee lá, náa Mbírì tí mbe 'dè 'vére jé lá ci ndâ 'duù gítí sàà gí nò.

³ O tí nó náa Mbírì ci nó mà gii gí gí, Mbírì gii uu gbí còngò có kóó mì wó nó. Bìndi yí gii kpili có mì wó nó jì ye, náa ye kpónó kù ma jì ndâ 'duù go kòcò wó tí Mbírì tí Mbe 'vala ndoo nò.

⁴ Ye kù cu wáràgà tí nó jì wò tí Tító, tí 'dóó 'vii mì ye, tacó ndà sósò'ô ta ndà a ndâ mbe tee njembí mítí Mbírì. Ye kù 'deke tí ye jì Mbírì tí Bu ndoo, ye delè kù 'deke tí ye jì Bìndi-Mbírì tí Jézù tí mbe 'vala ndoo, éno máa, ndú 'ví bàkà nambeè jì wò, ndú delè 'ví si 'bí i 'ví ba muu lo lá.

Nèté mì Tító gbí to Kèrèti

⁵ Ye táánò si wò mí Kèrèti, tacó wàa, wò 'ví 'viindi ndâ i kà. Ye táánò 'dè có jì wò éno máa, wò 'ví nò ndâ 'bí kpo 'duù, wàa wò 'ví bàkà ndú tí ndâ kpo 'duù kùṛo ndâ mbe kù kili ta rẹ̀ mì

Bìndi-Mbírì ta ndi gbí ndâ gbata gbí to Kèrèti gbaànjé-gbaànjé 'dáá gî.

⁶ Ndâ ña ndâ kpo 'duù tí nó 'ví dù a ndâ cèe kpo 'duù, ta tó muu ndú. Ndú 'ví dù me ndâ mbe kò ñjèèkù niì lá. Ndâ 'viì mì ndú 'ví dù a ndâ mbe ùnje gítí Bìndi-Mbírì, tí ndâ 'viì mbe kù 'di có, ta tó rẹ ndú.

⁷ Tacó 'duù ñinó tí kpo 'duù kùro ndâ mbe kù kili ta rẹ mì Bìndi-Mbírì nó a mbe kpolo tí 'bá mì Mbírì. À má éno, yí 'ví dù me ña 'duù ñinó náa ndâ 'duù kù no nje ndú gítí ndâ cè bà i mì wó nó lá; yí 'ví dù me ña 'duù ñinó mbe koṛo có máa, à 'ví si có 'dáá ká mítí có mì yì nó lá; yí 'ví dù me 'duù ñinó ta tàkòcò wó kù kpolo ká gálà nó lá, yí 'ví dù me vò mbe njù pe lá, yí 'ví dù me mbe cee có gbí òkò tí ndú ta 'duù ta 'bì wó lá, yí 'ví dù me ña 'duù ñinó ta njembí wó ká gítí bà 'de i gbí i nó lá.

⁸ 'Duù ñinó tí kpo 'duù kùro ndâ mbe kù kili ta rẹ mì Bìndi-Mbírì nó 'ví dù a 'duù ñinó mbe kù te wiṛi mítí ndâ mbe 'dó-'do, yí 'ví dù a 'duù ñinó ta go bà bàkà tó i kuu tí wó, yí 'ví dù a 'duù ñinó náa a muu ká tí wó, yí 'ví dù a 'duù ñinó jáá kùro Mbírì, yí 'ví dù a 'duù ñinó náa tàkòcò Mbírì kù peteke gítí wó, yí 'ví dù me 'duù ñinó mbe kù bàkà i gí tàkò có mì sé njembí nó lá.

⁹ 'Duù ñinó tí kpo 'duù kùro ndâ mbe kù kili ta rẹ mì Bìndi-Mbírì nó 'ví dù a mbe zèe yúcó tí nó ta kponje gítí wálá náa à ñibà ji yí nó ta 'bì wó sósò'ò, tacó wàa, yí 'ví 'de ta wotí bà ñibà yúcó ji ndâ 'duù, yí delè 'ví 'de ta wotí bà uu gbí còngò 'véřè mì ndâ mbe kù 'vii 'véřè mítí yúcó

nó jì ndú.

10 Tacó ndâ tù-ká-kpò-có, ta gbí có mì ndú wálá, tí ndâ mbe 'véřè mbe kú eendi ndâ 'duù me mbè kuu tí . Ndâ mbe le bèřè ndâ i 'véřè tí nò kpolo ma a ndâ mbe zèè có gítí tàkìì bà ya gí gbí gàzâ.

11 Wò 'ví si ndú 'ví njaanga nje ndú lá. Tacó ndâ ña ndâ 'duù tí nò a ndâ mbe volo 'bá mì ndâ 'duù ta bà nìbà ndâ i ñìnó mbe 'vii řo 'bá lá nò. Ndú delè kú bàkà ndâ i-nò tí nò ká tacó bà zò-nje ndú cuki.

12 A 'bí 'duù tí 'dóó òò ndú, delè tí mbe 'dè-kòcò mì ndú tí ndâ 'duù Kèřéti táánò, ká 'dè có éno máa, «Nèté mì ndâ 'duù Kèřéti káa bà 'dè 'véřè cuki. Ndú a ndâ mbe kpó, tí ndâ mbe gàmàtà ta i gbí ndú wálá.»

13 Có tí nò náa 'duù tí nò 'dè nò a yúcó. À má éno, baraka mítí ndú, tacó wàa ndú 'ví dù tí ndâ cèe mbe tee njembí ndú mítí Mbířì,

14 wàa ndú 'ví je mbí ndú mítí ndâ tà-ká-tà 'véřè mì ndâ Jùdèyà lá, ndú delè 'ví bàkà go ndâ có mì ndâ 'duù tí nó náa bà 'di yúcó me cékéle gbí tú ndú gí nó lá.

15 Ndâ i 'dáá gí kùřo ndâ 'duù ñìnó ta njembí ndú ngbářàngà'i kùřo Mbířì nó káa ndâ ngbářàngà i, káa ngbářàngà i kùřo ndâ 'duù ñìnó tí ndâ voló-volo 'duù mbe tee njembí ndú mítí Mbířì lá nó wálá, tacó muu ndú, ta ndâ kpokèjì bà kořo có mì ndú volo gí.

16 Ndú kú bàkà tí ndú tí ndâ mbe ñò Mbířì ni gí, káa cè ña bà bàkà ndâ i mì ndú dooko gítí bà bàkà i mì ndâ mbe ñò Mbířì ni gí lá. Ndú a ndâ

vò 'duù, tí ndâ mbe kpò có, mbe 'vii tí ndâ mbe bàkà tò i lá.

2

Cèe bà nìbà i

¹ Káa à má gítí lo, wò 'ví nì ji ndâ 'duù káa bà kpokèjì mì yúcó.

² 'Dè có ji ndâ kpo 'duù máa, ndú 'ví si tí ndú ji pe lá, ndú 'ví dù tí ndâ mbe koṛo có, ndú 'ví dù me tí ndâ 'duù ñinó mbe kù bàkà i á gí tàkò có mì sé njembí nó lá, ndú 'ví dù tí ndâ 'duù ñinó mbe ùnje gítí Mbírì ta njembí ndú gbaànjé, ta go ndâ 'duù tí ndú, ndú delè 'ví dù me ña ndâ 'duù ñinó tí ndâ nuù-gú-nuù-bè'dè nó lá.

³ Wò delè 'ví 'dè có ji ndâ nì ñinó ta gbí dèi ndú mbe yù gí nó, máa, ndú 'ví bàkà i á go i mì ndâ 'duù ñinó mbe kù co tí kpokèjì mì Mbírì nô. Ndú 'ví dù me tí ndâ mbe túbà vò kpokèjì ji ndâ 'duù lá. Ndú 'ví dù tí ndâ mbe vò nje lá. Ndú delè 'ví dù tí ndâ mbe zèè ngê pe lá. Ndú 'ví dù tí ndâ mbe nìbà cèe kpokèjì bà 'vala ndò á 'bá ji ndâ 'duù,

⁴ tacó wàa, ndú 'ví dù tí tí ndâ mbe kpo-gbì-tà-tù ndâ 'vinì ñinó mbe kù kpolo gí yaà gí tàkò ndú nó gítí bà zè ndâ 'dakò mì ndú, ta ndâ 'vii mì ndú, nìkì maa.

⁵ Ndú 'ví kpo-gbì-tà-tù ndú tacó wàa, ndú 'ví dù tí ndâ nì ñinó mbe ni bà koṛo có gí, ta ṛo ndú mbe me vá lá. Ndú 'ví dù tí ndâ nì mbe zèè 'bá mì ndú. Ndú delè 'ví dù tí ndâ nì ñinó ta 'dè njembí ndú, mbe kù 'di có mì ndâ 'dakò mì ndú nô. 'Dè có ji ndú máa, ndú 'ví nìbà ndâ i tí nò

ji ndâ niì, tacó wàa, ndâ 'duù 'ví go ta 'véřè mí tí có mì Mbířì lá.

⁶ Wò delè 'ví kpo-gbí-tà-tù ndâ 'viì-'dakò máa, ndú 'ví tè gí tàkò có mì ndâ i gbí kù ndú lá.

⁷ Wò 'ví dù tí 'duù ñinó náa ndâ 'duù 'ví ñò bà bàkà ndâ tó i 'dáá gí ni a i 'do mì lo. Wò má kù ñibà i ji ndâ 'duù, wò 'ví túbà tí lo ji ndú tí 'duù ñinó ta bà lê tí lo wálá. À delè 'ví dù gbí kòcò lo a wotí go kòcò gba.

⁸ Wò 'ví 'dè ji ndâ 'duù a ndâ cèe có ta ñi ká gbí ndú, tí ndâ có ñinó náa wotí bà 'vìsì tende có gí tàkò ndú 'ví dù tí 'bí 'duù wálá. Tacó wàa, ndâ mbe kù jòò gbí có ta ndoo 'ví ñò 'dóó có ñinó náa ndú 'ví kpi tí ta ngbàngà tí ndoo nó lá.

⁹ 'Dè có ji ndâ bòò máa, ndú 'ví 'di có mì ndâ mbe tí ndú. Ndú delè 'ví bàkà go có ñinó gbí njembí ndâ mbe tí ndú nó ta o 'dáá gí ta kponje mì ndú gítí wálá.

¹⁰ Ndú delè 'ví po ndâ 'bí vící i mì ndâ mbe tí ndú lá.

Ndú 'ví dù tí ndâ 'duù jáá, tacó wàa, ndâ i tí ñò 'dáá náa ndú kù bàkà ñò 'ví sì ta ndâ 'duù 'ví wu gbí bà ñibà i mì Mbířì tí Mbe 'vala ndoo.

¹¹ Wò ñò ni gí, máa, Mbířì túbà nambeè mì wó a i tacó bà 'vala ndâ 'duù 'dáá gí.

¹² Mbířì kù bàkà nambeè ji ndoo, tacó wàa, ndoo 'ví ñò tí ni éno máa, ndoo 'ví 'dò kò ndoo mítí kpokèjì ñinó mbe kù ya ta ndoo gí 'dè 'do tí wó tí Mbířì nó lá. Delè tacó wàa, ndoo 'ví dù ta go ndâ i tí nó muu to tí nó mbe ya gí gbí có mì wó tí Mbířì lá nó, lá. Mbířì kù bàkà nambeè ji ndoo, tacó wàa, ndoo 'ví ñò tí ni éno máa, ndoo

'ví 'vala ta muu ndoo ngbárángà'i, tí ndâ 'duù jáá kùro wó tí Mbírì

¹³ kù ù ta ndi bà gí líkí'o mì ndoo, náa ndoo kù koṛo có lí mítí , tí o bà tù ngba gbolò Mbírì mì ndoo, tí Mbe 'vala ndoo, tí Jézù, tí Bìndi-Mbírì,

¹⁴ mbe sì miri wó ji ku, tacó bà njaanga miri ndoo 'do gbí ndâ ña ndâ vò i 'dáá gí, nô. Yí bàkà ndoo tí ndâ ngbárángà 'duù, tacó wàa, ndoo 'ví dù tí tí ndâ 'dóó 'duù mì yì; delè tacó à 'ví dù tí ndoo káa go bà bàkà tó i cuki.

¹⁵ Kò-kò ta ndâ có tí nò ji ndâ 'duù. Tùbà cèe kpokèjì ji ndâ 'duù ñìnó mbe gírì'o gí nó ta bà do mítí ndú ta gúku tí lo wálá, go i mì gba. Wò 'ví si 'bí 'duù gbaànjé 'ví si wò tí 'dé 'duù lá.

3

Bà bàkà ndâ i ñìnó mbe kù koni ndâ 'duù

¹ 'Va mbí ndâ 'duù mì lo máa, ndú 'ví 'di có mì ndâ gba mì ndú, ta ndâ kpo 'duù kùro ndú. Ndú ta o 'dáá gí 'ví dù ká léngé-linge kù ù bà bàkà i ñìnó náa à tí .

² Ndú 'ví 'dè vò có gítí ndâ 'duù lá. Ndú delè 'ví dù tí ndâ mbe kù kii'bà 'do tí bà 'dèèkè mà. Ndú 'ví dù tí ndâ 'dè 'duù mbe kù si ndâ ña ndâ 'duù 'dáá gí tí i.

³ Tacó, 'bí o táánò kuu tí náa 'dóó ndoo ta miri ndoo a ndâ mbe ñónókó, tí ndâ tù-ká-kpò-có, náa à kù eendi ndoo. Njembí ndoo ta o tí nò ká gítí ndâ tende ña i mbe ñikì tí ndoo muu to tí nô. O mì ndoo ta o tí nò ká gítí bà tò kii, giì je bà bàkà ndâ i ñìnó mbe kù mìlísé tí ndâ 'bí 'duù nô. Ndâ 'duù ta o tí nò kù sogo ndoo. Ndoò delè ta o tí nò kù sogo tí ndoo gbí òkò tí ndoo.

4 Káa Mbíri tí Mbe 'vala ndoo nó gii túbà nambeè mi wó, ta tó bà zè ndoo mi wó,

5 ta bà 'vala ndoo. Káa yí 'vala ndoo nò me gí tàkò 'bí ña tó i náa ndoo bàkà jì yí nò lá; à káa 'dóó bà ñò yè ɾo ndoo mi wó ká si yí 'ví 'vala ndoo, go có mi wó gbí njembí wó. Yí 'vala ndoo ta bà caka tí ndoo ta ngo, mbe kpò gbí ndi bà jò ndoo. Bìndi yí gii bàkà ndoo tí ndâ ngu 'duù ta bà tuu Bèri mi wó tí Mbíri jì ndoo.

6 Mbíri je Bèri mi wó jì ndoo tókà'i ta ɾè mi Jézù, tí Bìndi-Mbíri tí Mbe 'vala ndoo.

7 Mbíri njaanga mi ɾi ndoo 'do gbí vò i, tacó wàa, ndoo 'ví dù tí ndâ 'viì-'bá mbe kù koɾo có lè mítí 'wálá ñinó mbe cee lá nò.

8 Ñinò a yúco ta kponje á gítí wálá ká nò.

Có gbí njembí ye éno máa, wò 'ví nanaka muu lo mítí ndâ có tí nò. Tacó wàa, ndâ 'duù ñinó mbe kù tee njembí ndú mítí Mbíri nó 'ví te tí mí gbí muu ndú máa, ndâ yí 'ví dù tí ndâ mbe bàkà ndâ tó i ta i ká gbí ndú tacó tí ndâ 'duù ta o 'dáá gí.

9 Káa wò 'ví kii'bà 'do tí bà tò ndâ kponje ñónókó, ta bà 'deke ɾè ndâ ká gù lo kpènjèngè'veè tí i 'vére mi ndâ Jùdéya. Wò delè 'ví kii'bà 'do tí bà 'dèkè mà ta bà 'dè wo muu ndâ có mi Mòze. Tacó nèté mi ndâ ña có tí nò wálá. I delè gbí ndú wálá.

10 'Duù má kù njèè gbí òkò tí ndâ mbe ùnje gítí Bìndi-Mbíri, wò 'ví ci yí, máa yí ɾò táyò 'do tí ña i tì nò, yee gbí só. Yí má biya bà 'di có mi lo gí, wò 'ví 'vee bà tí wó káká'i lá.

11 Káa, wò 'ví ñò ni éno máa, ña 'duù tí nò a wóló-volo 'duù, tí vò mbe bàkà vò i, mbe le wú

mítí miṛi wó ta kpéetí wó gî.

Ndòngbú có mì Páwòlò jì Tító

¹² Ye kèjì gí bà tuu 'bí 'duù gbaànjé 'do gbí òkò tí ndâ Àrètémà ta Tikíkùsù jì wò. 'Duù tí nò náa ye bà tuu yí nò má yee tí lo ngé gî, wò 'ví gí gálà gí bà 'de ye gbí gbata Nìkòpólìsì, tacó ye kù koṛo có bà cì ndâ pì cò'o tí nó kèjì nó a i mí kà.

¹³ Je wotí gítí nó mì ndâ Àpólò ta Zénà tí nó tí mbe kù waa có gbí ngbàngà nò.

¹⁴ Ndâ 'duù mì ndoo 'dáá gî 'ví tala bà bàkà ndâ tó nèté, tacó wàa ndú 'ví 'de ta i tacó bà konì tí ndú, náa 'bí i má gbaaka ndú nò; ndú 'ví dù me tí ndâ 'duù ñìnó ta i gbí ndú wálá nó, lá.

¹⁵ Ndâ 'duù tí nó náa ze ta ndú kàá nó 'dáá gî 'vee wò ma. 'Dòkò ndi 'vé mì ze á jì ndâ tó nambe ze ñìnó mì yo kà mbe kù tee njembí ndú mítí Mbíṛì nò.

Ye kù 'deke tí ye jì Mbíṛì máa, yí 'ví bàkà nambeè mì wó jì yo 'dáá gî.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa